

ЖАҚСЫНЫҢ АТЫ, ҒАЛЫМНЫҢ ХАТЫ ӨЛМЕЙДІ

А.Р. Әліпбаев, Б.З.Бөжеева,
әл-Фараби атындағы ҚазҰУ

Әл-Фараби атындағы Қазақ ұлттық университеті бүгінгі күні еліміздегі тіпті әлемдегі елеулі университеттердің қатарында. Оған ең алдымен QS халықаралық рейтингісіндегі әлемнің 800 үздік университеті арасында шығыстың ғұлама ғалымы, философы Әбу Насыр ибн әл-Фарабидің есімімен аталған Қазақ ұлттық университетінің жоғары орынды иеленуінің өзі-ақ дәлел. Әрине университет бұл жетістікке заман ырғағына сай жетіпудің арқасында жетіп отыр. Соның негізінде әлемдік білім беру жүйесінде өз ұстанымын жетілдіре отырып, халықаралық білім беру үлгілерін өзінің жалпы даму бағыты ретінде айқындаған. Сол ретте жоғары білікті мамандарды дайындау үдерісі әлемдік білім кеңістігіндегі интеграцияланумен қабаттаса жүргізілуде. Ол академиялық ұтқырлық үрдісінің, білікті мамандармен алмасудың тиімді жүзеге асуы арқылы, сондай-ақ іргелі және қолданбалы ғылыми зерттеулерді дамытуға бағытталған инновациялық әдіс-тәсілдердің кең етек алуымен арта түсуде. Университеттің заман ағымына орай дамуына әр студенттің, әр оқытушының, әр профессордың өзіндік үлесі ерекше деп атап өтуге болады. Тіпті, сонау алғашқы тәуелсіздік жылдары оң-солымызды толық айқындай алмай жатқанда, әл-Фараби атындағы Қазақ ұлттық университетінің профессоры Ж.О. Ибрашев еліміз үшін жаңа мамандықтың қажеттілігі туралы алғашқылардың бірі болып ой қозғаған еді. Халықаралық қатынастар факультеттің ашылуына профессор Ж.О. Ибрашев ұйытқы болса, халықаралық қатынастар факультетінің тұңғыш деканы болған Г.Жамбатырова да жаңа мамандықты жетілдіру саласында орасан зор еңбек еткені белгілі. “Жақсының жақсылығын айт - нұры тасысын” - деген халқымызда ұлағатты сөз бар. Сол ретте тектіліктің үлгісі бола білген, қазақтың халықаралық қатынастар мамандығының негізін қалаған асқар тұлға, белгілі ғалым, ұлағатты ұстаз, ғұмырының 65 жылын әл-Фараби атындағы Қазақ ұлттық университетінде өткізген, соңғы демі үзілгенше дәріс оқыған Жарас Омарұлы Ибрашев осы ұлағатты сөзге толығымен лайық алам. Профессор Ж.О.Ибрашев өресі биік, танымы терең, санасы сергек, қай нәрсені де парасатпен пайымдап, сабырмен саралай білген жан. Ортамыздан кеткеніне бір жылдан астам уақыт өтсе де, Жарас Омарұлының бейнесі, әрбір қимылы, әрбір айтқан ойлары көз алдымызда, жадымызда. Қазақтың бір туар азаматтарының бірі - Жарас Омарұлы Ибрашевтың өнегелі өмірін келешек жастарға жеткізу мақсатында халықаралық қатынастар факультетінде халықаралық қатынастар және әлемдік экономика кафедрасының доценттері Б.З.Бөжеева мен А.Р.Әліпбаевтың ұйымдастыруымен “Жақсының аты, ғалымның хаты өлмейді...” атты эдвайзерлік сағат өткізілді. Аймақтану мамандығының 2 курс студенті Жарылғасова Светлана өзінің Ж.О.Ибрашевқа арнап шығарған арнауын оқыды. Шара барысында доцент Б.З.Бөжеева профессор Ж.О.Ибрашевтың өмірбаяны туралы баяндады. Доцент А.Р.Әліпбаев студенттерді ғалымның жарық көрген 200-ден астам ғылыми және ғылыми-публицистикалық мақалалары, 5 монографиясы мен бірқатар оқу-әдістемелік оқу құралдарының жарық көргендігін тілге тиек ете келе, осы құнды еңбектердің негізгі бағыттары жайлы мағлұматтар берді және де студенттердің назарларына ғалымның жаһандану мен интеграция мәселелеріне, ұжымдық және көпжақты дипломатия, еуропалық интеграцияға, Орталық Азия аймағындағы интеграциялық үдерістерге қатысты ойлары туралы бейне фильмнен үзінділер ұсынылды. Жарас Омарұлының ғылыми жетекшілігімен 10 ғылым докторы, 34 ғылым кандидаттары және 2 философия докторы (Phd) өз диссертацияларын ойдағыдай қорғаған болатын, осы шәкірттерінің көпшілігі халықаралық қатынастар факультетінде еңбек етуде және факультеттің одан әрі дамуына орасан зор үлес қосып жатқандықтан, доцент Б.З.Бөжееваның эдвайзерлік тобы аймақтану мамандығының 3 курс студенттерінің ат салысуымен “Профессор Ж.О.Ибрашевтың халықаралық қатынастар факультетіндегі ғылыми мектебінің шежіресі” деп аталатын стенд жасалынып, факультетте ілінді. Эдвайзерлік сағатқа қатысушы халықаралық қатынастар және әлемдік экономика кафедрасының доценті Б.М.Балаубаева профессор Ж.О.Ибрашев туралы өзінің жылы лебізі мен қызықты естеліктерімен бөлісті. Зиялылықтың лебі сезіліп тұратын Ж.О. Ибрашевтің ғұмыры қай жағынан қарамасаныз да, бүгінгі әріптестері мен болашақ жастар үшін тек үлгі мен өнегеге толы. Сондықтан да ғалымның ұшан-теңіз еңбегі ұрпақтар жүрегіне әрқашан жарқырап, нұр шашып тұрады сөзсіз.

Алматы қаласы.